

Tuah buat dua pelajar Usim

Terpilih sertai Oxford Leadership Programme

■ HAMIZAH BASIR

NILAI – Dua penuntut Universiti Sains Islam Malaysia (Usim) dipilih mewakili universiti menyertai program khas kepimpinan di Universiti Oxford, United Kingdom (UK).

Program Student Parliament: Oxford Leadership Programme 2015 julung kali dianjurkan dengan Universiti Islam Antarabangsa Malaysia (UIAM) sebagai peneraju mendapat kerjasama Kementerian Pendidikan Tinggi dan Oxford Academy for Education and Development (OAED).

Usim diwakili pelajar jurusan Sarjana Muda Syariah dan Undang-undang, Fakulti Syariah dan Undang-undang, Abdul Muiz Abdul Hakim, 22, dan pelajar Sarjana Muda Matematik Kewangan, Fakulti Sains dan Teknologi, Muhammad Miqdam Rashid, 22.

Menurut Abdul Muiz yang juga Yang Dipertua Majlis Perwakilan Pelajar Usim, peluang yang diberikan itu memberi ruang kepadanya untuk meneladani Parlimen British, transformasi kepimpinan dan pemilihan di Oxford Union.

"Saya tak sangka terpilih mewakili universiti dan kesempatan ini akan saya manfaatkan sebaiknya. Sebagai pemimpin pelajar di kampus, saya akan mengambil dapatan dan idea menarik di sini untuk dimanfaatkan di universiti nanti.

"Saya juga telah buat kajian



Muhammad Miqdam (kiri) dan Abdul Muiz di hadapan St Hugh's College, Universiti Oxford, yang merupakan kolej pengajian terbesar di Universiti Oxford.

berkaitan institusi Parlimen dan Kesatuan Pelajar di Malaysia dan Britain sebagai ilmu awal sebelum ke sini," katanya.

Sementara itu, Muhammad Miqdam yang juga Presiden Sekretariat Kesukarelawan Mahasiswa Usim berkata, dia berterima kasih kepada pihak pengurusan universiti kerana memilih dan mempercayai kemampuan dirinya.

"Segala pengisian yang disusun khas untuk kami di Universiti Oxford akan diterjemahkan dengan sebaiknya untuk pembangunan ummah dan negara. Ia sesuatu yang baru bagi saya, jadi pembacaan awal berkaitan ekonomi, sosio masyarakat, budaya dan pencapaian negara ini diharap membantu," katanya.

Seramai 18 orang terpilih

dalam kalangan pemimpin Parlimen Mahasiswa di universiti masing-masing untuk berada di Universiti Oxford selama seminggu sejak Ahad lalu sehingga Sabtu ini.

Sepanjang berada di sana, mereka akan mengikuti kursus berbentuk kepimpinan, kebolehpasaran kerjaya, keusahawanan, program khidmat komuniti dan melihat kemudahan di Universiti Oxford seperti Bodleian Library, Blackwells Bookshop dan Oxford Natural History Museum.

Pengisian ini secara langsung dapat mempersiapkan mereka sebagai pemimpin pelapis yang menyumbang kepada kecemerlangan universiti dan agen perubahan kepada masyarakat sekitar.



Para pelajar yang mengikuti Program Kepimpinan di Universiti Oxford bergambar bersama Timbalan Rektor (Hal Ehwal Pelajar) UIAM, Profesor Datuk Dr Mizan Hitam (enam, kiri).